

四庫全書

集部

欽定四庫全書

集部

宋元詩會卷三十二至四

詳校官中書臣陸 湘

主事銜臣徐以坤覆勘

總校官知縣臣繆 琪

校對官中書臣牛稔文

謄錄監生臣袁繼升

欽定四庫全書

宋元詩會卷三十二

兵部主事陳焯編

黃裳

字冕仲延平人元豐間舉進士第一官至尚書有  
演山集六十卷莆田王悅序其稿曰延平有劍潭  
綿亘數百里蛟龍宅之其北曰演峰氣象清奧為  
神人棲息之地尚書端明黃公家於其間集名演  
山蓋有取焉公之高文大冊汪洋瀚漫不知紀極  
當韋布時著作已林立矣及存歷華要撰述愈勤  
要之淵源六經栽培教化故足尚也按王序如此  
其文不多傳於世惟山谷詩中屢有與冕仲倡和

之作則風致  
亦可想見矣

道倫竹閣

曾看孤山翠微麓回環閣下千莖竹  
醉吟先生唐室賢  
灑落情懷出流俗赤城德士攀高風  
特借嘉名榜山腹  
雪霜難犯中心虛直節凌雲聳蒼玉  
月華弄影無纖塵  
合有丹霄鳳來宿

燕子樓

盼盼初歸樓上時相如燕子長雙飛  
有才將色世間少

況復節義猶堪依將軍一去十餘載玉簫瑤瑟無心解  
豈不能死空相隨以色累公非所知白老曾為賦詩客  
風裊花枝醉無力後會勲郎漢陽驛因語欷歔已成昔  
走筆還賡美人句猶感白楊堪作柱我來登賞非唐人  
尚引多情聊愴神人生興盡皆為塵百年一餉難留春  
高樓人散誰復親只有燕子年年新

簡元興祠部

百花巖上仙人住巖下為州山水聚白頭青塚南北人

倒影沈沈獨懷古倚欄把酒與誰同況是使君為獻主  
應喚漁舟疎葦中旋膾遊鱗落紅縷祕書座上最軒昂  
能共春雲爭態度紅衣帶月今何處幾轉春殘掩朱戶  
飛船送客空斷腸梁塵謾落聲中句虛白亭前湖水閒  
忽為霓裳起思慕出門沙土亂如雨薰風吹夢天南去

簡無咎學士

北澶車馬來何暮芹茅池邊失歡聚有分共為文字遊  
却向西郊話今古世俗聰明多澆漓信厚期君中有主

職事無塵靜相對滿榻詩書香數縷嚴扃如在柳陰中  
綠帷朱簾細風度紫犀鈿破雪花濃石鼎煎聲遶牕戶  
準擬七椀邀盧仝清滌煩襟出新句共笑先生最貧苦  
誤使簾前客相慕虛名薄利能幾多裹飯區區來復去

初秋偶作

火行金候兩猶爭擾擾蚊蠅自未平雲漏雨聲蒸地爽  
日含山色暮天明直須紈扇恩情斷始向籬花意態生  
萬里薄寒無一點月明中看雁初橫

聞雁

露下多時雁未鳴  
數聲雲外此宵征  
北人書到三秋盡  
南國弓開一字橫  
孤館有誰驚好夢  
平蘆何處起寒更  
想應俎上終須免  
宜向方塘寄此生

除夜送代倪簽判

北風吹雪抹潮頭  
待過東南第一州  
去客情生來歲夢  
隔江燈照此時愁  
玉皇謫吏行當復  
金闕除書即便收  
言簡氣清終有用  
卧龍山下自難留



社日遊雲門山

不須扶我自登山脚力能勝十八盤一字雁低頭上過  
兩城人細掌中看雖知北戶緣猶在却笑南柯夢未闌  
忽見歸雲應是信滿襟先得洞天寒

晁冲之

字叔用舉進士與喻汝礪為同門生紹聖間黨禍  
興其兄以道及羣從多入黨人籍中叔用遠引遁  
居具茨山下踰十年廷議將欲用  
之竟高蹈不起其詩有具茨集

紀愁

北風吹我裳夏潦漂我屋牛羊踐我稼雀鼠耗我穀雪  
寒墮我指雨淫疾我腹朝行桑榆間秋序傷遠目莫涉  
水之涯含沙中兩足攬轡馬病黃伏軾輿脫輶陟山既  
見虎還舍乃對鵬一沐三握髮十飯九不肉先生昔離  
垢居士今耐辱飽餐戒畏塗那知有沈陸

雪

月落雞聲寒曉色靜茅屋開門驚不知夜雪壓脩竹槎  
牙生新水鱗甲刻溪谷晶晶洲渚明冽冽川原肅孤蹲

雀不動沈酣客猶宿呼童晨汲歸獨漱寒泉玉

陸元鈞宰寄日注茶

我昔不知風雅頌草木獨遺茶北諷陋哉徐鉉說茶苦  
欲與淇園竹同種又疑禹漏稅九州橘柚當年錯包貢  
腐儒妄測聖人意遠物勞民亦安用含桃熟薦當在盤  
荔子生來枉飛鞚羊羶異好亦何有蚶菜殊珍要非奉  
君家季疵真禍首毀論徒勞世仍重爭新鬪試誇擊拂  
風俗移人可深痛老夫病渴手自煎嗜好悠悠亦從衆

更煩小陸分日注密封細字蠻奴送槍旗却憶採擷初  
雪花似是雲溪動更期遺我但敲門玉川無復周公夢

贈僧法一墨

黃山之巔百尺松虬枝偃蓋連羣峰山神守護魑魅避  
道人剪伐天為容捫崖蹠蹕篝火遠絕壁晻靄凝烟濃  
玄霜霏霏玉杵下捕麋煮角當嚴冬陰房風日不可到  
律琯吹盡灰無蹤小書細字著名姓黃金照耀圖雙龍  
守臣再拜選進日九闕有詔開重重老儒偶得實天幸

千金更買無由逢上人淡泊何所好  
工書草隸如飛蓬  
苦來求我惜不得一酬十載相過從  
君不見玉堂詞人  
紫垣客拜賜舞蹈黃羅封長安紙價猶未貴  
江南江北  
山皆童

復以承晏墨贈之

法一謂前  
墨不佳故

我聞江南墨官有諸奚老超尚不如廷珪  
後來承晏復  
秀出喧然父子名相齊百年相傳文斷碎  
彷彿尚見蛟  
龍背電光屬天星斗昏雨痕倒海風雲晦  
却憶當年清

暑殿黃門侍立才人見銀鈎灑落桃花牋牙牀磨試紅  
絲研同時書畫三萬軸大徐小篆徐熙竹御題四絕海  
內傳祕府毫芒惜如玉君不見建隆天子開國初曹公  
受詔行掃除王侯舊物人今得更寫西天貝葉書

簡江子之求茶

政和密雲不作圃小夸寸許蒼龍蟠金花絳囊如截玉  
綠面彷彿松溪寒人間此品那可得三年聞有終未識  
老夫於此百不忙飽食但苦夏日長北牕無風睡不解

齒頰苦澁思清涼故人新除協律郎交遊多在白玉堂  
揀牙鬪夸皆飫嘗幸為傳聲李太府煩渠折簡買頭綱  
寄王立之

臘雨城南宅衝寒憶屢陪拊憐庭下石問訊竹間梅諸  
子鷹門立羣公跋馬回不知多病後誰與倒樽罍

寄江子之

平生江季子疎懶近忘吾不啻三年別如何一字無燒  
丹勾漏令釀酒步兵厨二者將安擇功名莫浪圖

初來東里

乘流從此去河漢失清都送騎沙邊散征帆雨外孤挾  
雌栖隴雉生子哺巢烏宇宙將焉往飄飄盡畏途

再至都城

崢嶸花萼西清曉望猶迷御路紅塵合宮槐碧瓦齊夾  
城知輦過複道覺香低中使傳宣入千門避馬蹄

秋雨感事

苦雨荒秋宅寒生木葉悲半縣藤護碧中缺蔓穿籬書



校時開帙竿垂日繫絲儒冠吾已誤何責五男兒

別飾道二十弟

責之

少傅三朝老文章壯九州賦詩資政殿賜字太清樓跋  
燭辭軒陞簪花近冕旒慶門吾老矣華國汝能不

別息道二十二弟

兌之

中令有清德風流二百年舉家惟食粥絕口不言錢里  
閑容吾老庭闈賴汝賢陶丘過范蠡莫泛五湖船

贈江子我子之

江郎淮海秀經術古同師溫潤無前輩清新有近詩一  
丘須蚤計五斗莫堅辭獻賦修竿牘知君定不為

送惠純上人遊閩

蚤聽閩人說土風此身嘗欲到閩中春溝水動茶花白  
夏谷雲生荔子紅襟帶九江山不斷梯航百粵海相通  
北牕夜展圖經看手自題書寄遠公

次四兄

以道

韻效李義山雪

暮冬一丈長安雪壯士臨風獨慨慷門巷豈無騎馬客

江湖猶有捕魚郎夜平蔡賊兵輕敵曉入梁園賦擅場  
載酒欲尋誰與飲江梅頭白自悲傷

和江子我竹夫人

黃藤白簟倦呼盧高卧南牕示楷模郭芍藥情元最密  
鄭櫻桃迹近相疎下帷度日甘同夢隱几終年得異書  
晚向禪房陪杖屨清秋霜霰意何如

復和少蘊內翰甥兼謝伯蘊通判兄再贈

西湖波浪還佳色風物悲人老可驚遊接竹林公對叔

夢迷春色我思兄  
酒沾鸚鵡杯行盡  
詩傍蟾蜍研立成  
壯思不逢韓吏部  
高名誰伴謝宣城

次韻集津兄懷嵩少示王立之

蚤聞三十六峰前  
願寄茅茨一澗邊  
谷轉馬蹄山繚繞  
巖闕虎口樹嬋娟  
陽坡日煖宜瓜地  
陰嶺天寒孰芋田  
便好與公相隱去  
不宜相對尚茫然

睡起

素屏紋簟徹輕紗  
睡起冰盤自削瓜  
風筍微微開綠籜

雨槐細細落黃花  
經營薄產初無意  
補葺疎籬漸有涯  
待得高秋尋靖老  
臨流坐石問丹砂

都下追感往昔因成

二首

少年使酒走京華  
縱步曾遊小小家  
看舞霓裳羽衣曲  
聽歌玉樹後庭花  
門侵楊柳垂珠箔  
牕對櫻桃卷碧紗  
坐客半驚隨逝水  
主人星散落天涯

春風踏月過章華  
青鳥雙邀阿母家  
繫馬柳低當戶葉  
迎人桃出隔牆花  
鬢深釵暖雲侵臉  
臂薄衫寒玉映紗

莫作一生惆悵事  
鄰州不在海西涯

送王敦素

樸

龍蟠山色引衡廬  
霜落清江影碧虛  
鼓枻厭騎沙苑馬  
行廚欲食武昌魚  
緩歌玉樹翻新曲  
趣入金鑾續舊書  
宦達故人稀會面  
君來相見肯如初

留別江子之

盡室飄零去上都  
試於溱洧卜幽居  
不從刺史求彭澤  
敢向君王乞鏡湖  
平日甚豪今潦倒  
少年最樂晚崎嶇

故人鼎貴甘相絕別後君須寄一書

題超化寺壁

曲池風定碧瀾平小白魚如鏡裏行水竹再來應識我  
壁間不用更題名

送人遊江南

湧金門外斷紅塵衣錦城邊著白蘋不到西湖看山色  
定應未可作詩人

立春

巧勝金花真樂事堆盤細菜亦宜人自慚白髮嘲吾老  
不上譙門看打春

晁說之

字以道無咎從弟蘇子瞻器之目為奇才作書識  
孟子崇觀間致仕隱嵩山後復起為女弟所誚晚  
附梁師成志  
節掃地矣

送陳叔易應召

處士誰人為作牙盃攜猿鶴到京華從今鄰壑堪惆悵  
六六峰前只一家



喻汝礪

陵陽人與晁冲之同門進士有捫膝稿其詩多見成都所傳海雲山詩甚佳惜字多譌誤姑舍之未錄也

遊嚴真觀支機石壁有記古鼎丹茅

古木共幽意長廊亦宴如於焉詠逍遙且復散衣裾塵慮颯已空道心頗閑舒不知度世人去此歲幾徂云何有丹砂尚爾留庭隅支機亦悠哉誰復訂有無我知此公意慨彼元封初繼之五鳳間斯民斃刀鋸聊欲謝世

網歛以道自娛抱獨理自會曠懷遺所拘初匪逃世人  
而世自我疎含默念斯人起我憂患餘

謁諸葛廟

孤雲何其高明月不可繫灼灼抱此心與世自涇渭釋  
耒從所歡感亂亦歔歔咨惟今之人竊國未云恥七首  
入吳市秋風動燕水區區袁與曹等是刺客耳而我于  
其間秉義不敢墜哀音回衝飈清義動幽邃天心固難  
亮吾獨信所履溶溶日間雲漠漠苔點砌饑饉墜蒼瓦

淡薄公所憇靜然想英安孤懷亦差慰

謁江瀆廟

坤軸東南傾大江日夜注前驅下洛洙餘濤略吳楚任  
勢不期勞得意緣所遇水也初無營神哉亮誰主芳蘭  
沈清華碧藻舒翠縷晨鵲戲野岸春鳬集深渚均是得  
所安伊神豈私汝古來幾精魂捨此迷所處淫遊不知  
還沙村失烟樹而我後千載悠然在江許抱甯貴無競  
矜名忌多取冥冥罨岫風淫淫打船雨舞雪窺洪濤開

蘋渡前浦再拜謝神貺聊復隨所住

晚泛浣花遂宿草堂

扣撓泛澄虛濯流睇幽芳晚霏襯奇樹夕霏媚疎篁歸  
鳥亦暫閒夜魄動初涼忽焉衆星微天高月舒光昔也  
杜陵子澹然此茅堂客至酒自斟句得意已忘云何常  
念饑零落在道旁古來技入神一飯豈所望吾輩天所  
窮慨歌淚沾裳

遊琴臺

皋朔語類俳上頗倡優之嚴吾數預事慘慄失所棲眷  
言彼姝子深情結幽期浩露泛酒甕輕雲思琴徽撫絃  
視八荒頗覺秦岫低紛紛漢諸子悟解良獨遲一朝不  
自保頸血霑裳衣公豈不炯戒慮禍蓋已微汚已迴前  
識達生邁天倪濶哉昭曠情豈屑後代嗤

草堂詩

六首

燦燦詩翁錦里西只緣詩好合窮栖竹鋪冷色雲連寺  
柳漾晴絲鳥過溪凝怨不禁闌樹暗駐情應恨蜀山低

離人苦怕春歸盡可忍紅英半著泥

閒把烟光次第陳岷峨風物見精神翻成錦繡千般樣  
供與江山幾處春深屋長河元老大蛾眉曼綠却逡巡  
從公乞取無邊手免作詩中半箇人

從教日日敞牕扉嫌怕風光入眼遲剩買芒屨供看竹  
趁乘春雨去栽楦苦無賓客僧來後薄有生涯鶴下時  
聞道鄰翁酒初熟新筍一酌莫相遺

遠嶼曲洲縱復橫沙邊繁鳥弄簫笙一軒簷冷松陰合

十里林香藥草生路轉斷楂逢石坐風移深竹見僧行  
晚來懷抱尤清曠時有幽人帶月耕

竹外清疎浸碧溪溪邊竹澹烟雲霏閒看雪嶺題詩罷  
醉罷西郊信馬歸霄漢直愁雙闕迴夢魂長著五陵飛  
故園秀木又春色只恐歸去池臺非

錦官城西春草芳杜陵客子憂思長浴晴晚樹淡浮綠  
卧水幽花深度香交情憫憫言燕阻舊國渺渺雲山蒼  
白蘋洲渚落日晩雲邊正銜歸雁行

韓駒

字子蒼仙井監人少有文稱政和初以獻頌補假將仕郎召試舍人院賜進士出身除祕省正字尋坐為蘇氏學出知州縣召為著作郎校正御前文籍分撰樂章除祕監遷中書舍人兼修國史尋擢直學士院制詞簡重為時所推高宗即位知江州紹興五年卒駒雅負詩名惜其進用多由宦者士論薄之

答蔡伯世食筍

蓴絲化鹽豉槐葉資新麵  
豈知苦竹萌風味常獨擅  
昔我居錦城屢喫田家飯  
扶杖自入箐煨此犢角  
繭後叅



鶴林禪餽我桑門饌蒸蒸沸鼎中亂下白玉片惟無它  
物乘始覺真味現三年客東都錦籜寧復見千金洛陽  
來惟充大臣膳前時過君食欣逢故人面那知列仙臞  
已雜蒯通雋吾寧飽甘肥憤吒那忍嚙請歸謂主孟廚  
人後當諫苦苾雜嘉蔬沈香和甲煎柯亭既誤椽畫障  
或遭練古來可歎事千載寄明辨作詩弔籜龍助子當  
食歎

題采菊圖

往在京口為曾公卷題采菊圖九日東籬采落英白  
衣遙見眼能明向令自有杯中物一段風流可得成  
蔡天啓屢哦此詩以為善然余嘗謂古人寄懷於物  
而無所好然後為達況淵明之高其於黃花直寓意  
耳至言飲酒適意亦非淵明極致向使無酒但悠然  
見南山其樂多矣遇酒輒醉醉醒之後豈知有江州  
太守哉當以此論淵明復作

二首

黃菊有何好且寄平生懷遇酒興不淺無酒意亦佳此

理誰復明自昔寡所諧空餘采菊圖寂寞縣高齋  
今日菊始華叢雁鳴相和若無一觴酒如此重九何悠  
然數酌盡會心豈在多醒來不復記散髮東山阿

謝錢珣仲惠高麗墨

王卿贈我三韓紙白若截肪光照几錢侯繼贈朝鮮墨  
黑如點漆光浮水舊傳績溪多老松奚超既死松亦空  
易水良工近名世珍才始不歸潘翁蕭然南堂一居士  
赤管喻麋無月賜借問元主何自來去年海中持節使

明牕宴坐不怱怱引紙磨墨寒生風自笑平生綰蛇蚓  
更慚爾雅注魚蟲殷勤二物從來遠裨海環瀛眼中見  
若欲揮寫藏名山不如却作談天衍

分寧大竹取為酒樽短脰寬大腹可容二升而漆  
其外戲為短歌

此君少日青而臞爾來黑肥如瓠壺縮肩短帽壓兩耳  
無乃戲學騶侏儒人言腹大中何有不獨容君更容酒  
未須常要託後車滑稽且作先生友少陵鉈樽安在哉

次山石白空飛埃茅簷對客夜驚笑麴生叩門何自來  
老向人間不稱意但覺淵明酒多味乞取田家老瓦盆  
伴我年年竹根醉

送趙承之祕監出守南陽

繁臺十月寒颼颼置酒共祖南陽侯九士一客相獻酬  
皆言南陽出水幽菊泉釀酒不論石上酥醞醕出肥牛  
使君樓前檣柚古丞相堂下蒲蓮稠夜然蠟炬賓醉舞  
春風敲眠百花洲各持一觴勸公飲此行樂矣公何求

我獨倚杖商聲謳此公人間第一流方今羣賢從法駕  
金莧塞路嘶驂騶獨令此公守一州臨分慷慨淚莫收  
南陽南陽樂復樂歸來歸來無久留

順老寄菜花乾戲作長句

道人禪餘自鉏菜小摘黃花日中曬峨嵋楸脯久不來  
麴糵薑絲典刑在封題寄我紙作囊中有巴蜀齋厨香  
起炊曉甑八月白配此春盤一掬黃

楸軟木耳八月白稻名也

泰興道中

縣郭連青竹人家蔽綠蘿地偏春事少山迴夕陽多暗  
水披崖出輕船掠岸過傳呼細扶柁吾老怯風波

次韻兼簡李道夫

麥秋宜晚起況復雨頻頻桃竹猶能杖柴車未可巾閒  
分酒賢聖靜記藥君臣曾有騎鯨李來陪賀季真

似矩尚書師枉道由臨川賦詩貽彥章內翰謹次

元韻送行

二首

喪亂乖離數衰慵問訊疎新霜上鬚鬢老淚溼襟裾忽

報迎車騎遙知奉璽書  
豈惟謀郤縠文亦似相如  
郡戟蒼山上平分二水流  
四時無癘氣五管有賢侯  
靜契羅公遠禪叅帛道猷  
人生一麾樂不必向中州

上泰州使君陳瑩中

當年賢路雜薰蕕歎息諸公善自謀  
今日在前皆鼎鑊後來知我獨春秋  
海邊已擊師襄磬湖上新逢范蠡舟  
惟有書生最無事不妨挾冊更西游

次韻參寥



此身不擬墮塵緣長恐驚鴻落響弦  
蹋盡世間千澗壑歸來曾次一山川  
深宮木末猶秋色故國天涯只暮烟  
憑仗道人分石甃要看庭下玉龍旋

夜泊寧陵

汴水日馳三百里扁舟東下便開帆  
旦辭杞國風微北夜泊寧陵月政南  
老樹挾霜鳴窸窣寒花垂露落繆繆  
茫然不悟身何處水色天光共蔚藍

次韻翁監再來館中

歸老江湖久自盟，睡餘且復對空枰。  
重來內閣人誰健，慣踏天街馬不驚。  
已喜劉歆分七略，尚傳韓愈誨諸生。  
太平潤色須公等，應許吾兼吏隱名。

登赤壁磯

緩尋翠竹白沙遊，更挽藤梢上上頭。  
豈有危巢與棲鶻，亦無陳迹但飛鷗。  
經營二頃將歸老，眷戀羣山為少留。  
百日使君何足道，空餘詩句在江樓。

次韻南溪觀魚

城西鼓櫂又城東不待溪分上下風  
碧樹垂楊間黃綠  
水盤行鱸簇青紅橫塘日暮林巒合  
斷岸秋來浦溆通  
安得此身無世累便隨漁艇入空濛

撫州邂逅彥正提刑道舊感歎

憶在昭文竝直廬與君三歲侍皇居  
花開輦路春迎駕  
日轉蓬山曉曝書學士南來尚巖穴  
神州北望已丘墟  
愁逢旌節滄江上握手秋風淚滿裾

余為著作郎如瑩為司令官舍皆在左掖門外高

頭坊紹興四年如瑩持節江西道撫相訪輒成  
長句

邂逅都城接下風官居總在日華東門瞻曲角趨朝近  
路轉高頭出局同今日繡衣新使者晚塗霜鬢舊鄰翁  
一盃無復當時樂赤縣黃圖淚眼中

六月二十一日子文待制見訪熱甚追記館中納  
涼故事漫成一首

鳳閣西頭千步廊與君長夏對胡牀陰陰檜色連宮草

寂寂茶聲度苑牆  
細乳分茶紋  
簾冷明珠壁  
炎小荷香  
身今老病投炎瘴  
最憶冰盤貯蔗漿

頃年侍立集英殿  
見周表卿唱名第二客居臨川  
表卿為宜黃丞歲滿訪別作詩送之

往時束帶侍明光  
曾看揮毫點御牀  
只道驂騑已騰踏  
不知鵬鶚尚摧藏  
官居四合峰巒雨  
驛路千林橘柚霜  
莫為艱難歸故里  
漢庭今重甲科郎

為亞卿作

三首

離歌三疊最關情不省從來此地聞蚤是春殘心事惡  
落花陰裏更辭君

更欲樽前抵死留為君徐唱木蘭舟臨行翻恨君恩雜  
十二金釵淚總流

君住江濱起畫樓妾居海角送潮頭潮中有妾相思淚  
流到樓前更不流

館中直宿書事

二首

十載名山慣杖藜清都直宿夢魂疑卧聞長樂鐘聲近

尚憶寒山半夜時

北風吹馬襲貂裘薄雪連雲凍未收銀闕晝開禽鳥白  
信知三館是瀛洲

謝人送鳳團及建茶

白髮前朝舊史官風鑪煮茗暮江寒蒼龍不復從天下  
拭淚看君小鳳團

張元幹

字仲宗永福人由上舍官大監所其祖文靖公未  
第時為劉氏壻劉無出蚤卒葬于福清其蹟漸泯

元幹從舊篋中得祖手澤因披榛莽求之為文立石以傳名幽巖尊祖錄聞者躋之生平尤篤友誼為可風云有

蘆州歸來集

過宿趙次張郊居

二首

北客多流落東村更寂寥肯同清夜夢不待故人招月  
挂荒園竹霜飛獨木橋聽雞休起舞且共說天驕

莫歎交遊晚相期歲月深秋來初識面老去要知心燈  
火須更僕杯盤取自斟平生王霸術袖手有微吟

花飛



雨暗連兵氣花飛點客愁  
寓居皆野寺相過只扁舟  
不作新塘去還為後柳遊  
盤餐雖杞菊得飽勝推牛

中秋不見月和范才元

不見中秋月長吟五字城  
浮雲有底急清影可憐生  
殘夜四更句故人千里情  
與君徒悵望天上自分明

劉希顏感懷次韻

避謗疎毛穎推愁賴索郎  
坐來春漏促夢去畏途長  
故國書題冷新詩齒頰香  
湖山雖好在歲月已相忘

寒食書懷

往昔升平客大梁  
新烟然燭九衢香  
車聲馳道內家出  
春色禁溝宮柳黃  
陵邑祇今稱趙地  
衣冠誰復問唐裝  
傷心寒食當時事  
夢想流鶯下苑牆

同錢申伯遊東山

掃榻開軒走寺宮  
吾曹終日得從容  
夕陽初落鰾谿路  
雲氣半遮獅子峰  
試問丹砂回白髮  
何如瀑布煮枯松  
暮年縱有壯心在  
歸意已勝山色濃

鮑由

字欽止處州龍泉人舉進士少親炙蘇軾於詩文得其指授徽宗召對除工部員外郎與執政不合罷去久之復召為郎再罷起知明州又知海州奉祠卒嘗註杜詩有文集五十卷

雨餘

礎潤雨欲作好風每相先  
蕭蕭清入簾令我心灑然閉  
門倦長夏枕書日昏眠快此風雨餘端如濯飛泉  
盆山有佳趣草木更幽妍  
井華養文石香篆橫雲烟俯仰方丈間  
勝事亦可憐永懷觸熱子我勞良獨賢

李昭玘

字成季濟南人少與晁補之齊名為蘇軾所知第  
進士教授徐州用李清臣薦為祕省校書加校理  
通判潞州入為祕丞歷提刑京東西路坐元符黨  
奪官徽宗立召為右司員外遷常少崇寧初再罷  
主管鴻慶宮入黨籍居間十五年寓意書畫自號  
樂靜先生靖康初以起居舍人召而已卒紹興間  
追復其官

春日遊金明池

日有江湖思坐無車馬塵橫橋自照水啼鳥不驚人輦  
路晴飛絮宮門暗鎖春多情老園吏灑地喜相親

# 張商英

字天覺蜀州新津人長身玉立負氣傲儻起家通  
州主簿章惇經制夔召與語奇之還朝薦擢監察  
御史以妄奏侵大臣責監荆南稅更十年乃得館  
閣校勘再責監稅赤岸哲宗初為開封府推官急  
於求進移書蘇軾自請入臺執政聞而不悅稍抑  
之未幾以司諫召遂力攻元祐大臣觀望押闔初  
無定嚮歷知洪州發運江淮入遷中舍崇寧初為  
翰林學士適相蔡京草制褒美得擢尚書左丞復  
與京議政不合入元祐黨籍罷知亳州京久盜國  
柄中外怨病見商英能立異同更稱為賢徽宗因  
人望相之商英為政持平稍革弊政人心益喜但  
意廣才疎機事不密終排于異已者晚貶崇信軍  
節度卒年  
七十九

孤憤吟 二首

平津諛武帝堯舜未為聰歸來東閣士稱頌比周公勢  
利變人心上下交相蒙低顏望眉睫一喜生春風優游  
卒茲歲安知朝野空

青青一本桑下可百夫息冷冷一井泉上有千人汲千  
里以為肥百里以為邑生齒豈不繁教化繁爾力何事  
北牕人歎此徒勞職

香林院

瑟瑟松上風冥冥竹間露  
牕虛草色寒石灰蒼苔古  
長廊寂無人殿閣下鈴語  
此意兩蕭然彷徨不能去

南峰寺

孤雲飛遠岫落日滿平川  
寺據南山頂僧傳北祖禪

擬峴亭

英雄往事堪歎息攔干徙倚情何極  
學取山公醉似泥  
不同羊祜謀人國

張塋

字子厚武進人登科不仕與東萊呂子  
進同年進士嘗作詩寄呂為時所稱

記夢中作

楚峽雲嬌宋玉愁月明溪淨印銀鈎  
襄王定是思前夢  
又抱靈衾上玉樓

寄呂子進舍人

籬鷁雲鵬各有程  
怱怱相別未忘情  
恨君不在蓬籠底  
共聽蕭蕭夜雨聲

遊山寺僧以惡草具進戲酬之



凍僕競競依竈燎山僧草草具盤飧井丹已厭嘗蔥葉  
庾亮何勞惜韭根

周紫芝

字少隱宣城人號竹坡老人六十一歲始第  
出知興國州稱循吏焉有竹坡詩話行世

莫愁歌

蓮花深紅蓮葉綠平沙月上鴛鴦宿青腰三板蘭作橈  
月下莫愁歌一曲移舟入花花轉深花深調苦難為音  
江邊半夜誰相語只有嬋娟知此心露花漸白月漸午

刺舟自覓來時路明朝繫纜柳邊門却在夜深潮落處

按近日坊選將此首為周竹坡作入元詩中不知竹坡卽紫芝卽少隱也

苔雪舟中

雲暗千家雨寒生兩岸秋水翻波入戶人覩玉明樓山色遮愁眼荷香滿客舟水晶宮裏夢還作此生遊

東耕老雪川

湖上雖相見重來失後期風塵為客久舟楫送歸遲雁遠無消息梅殘惱別離何時酌君酒爛漫說新詩

汪革

字信民臨川人嘗謂人咬得菜根  
斷則百事可做所著有青谿類稿

寄謝無逸

問訊江南謝康樂溪堂春木想扶疎高談何日看揮麈  
安步從來可當車但得丹霞訪龐老何須狗監薦相如  
新年更勵於陵節妻子同鋤五畝蔬

霍洞

字太清常州武進人崇寧  
間狀元霍端友之從孫也

宿田舍

北風吹晴屋滿霜翁兒赤體悲無裳閨中幼婦饑欲泣  
忍饑取麻燈下績一身豈暇私自憐鳴機軋軋明牕前  
織成五丈如霜布翁作襴裙兒作袴明朝官中催租急  
依然赤體當風立

太守春遊呈以絕句

朝來五馬去尋春誰信家家甑有塵枕藉道旁宜細問  
恐非芳草醉眠人

何大圭

字晉之廣德人宣  
政間為館職有聲

偶然作

茅屋松牕小隱家  
茶烟漠漠水斜斜  
簷間乳燕未成語  
庭下石榴爭放花  
賴有詩書銷白日  
倦隨車馬走黃沙  
林泉舊約好徑去  
風雨滿江垂釣車

周知微

字明老晉陵尉  
同時有陸元光  
者晉陵宰也亦能詩  
附見於此

題臨淮雙頭白蓮圖

既不學叔隗李隗南歸骨又不學大喬小喬東入吳一  
種桃根與桃葉若為化作雙芙蓉臨淮政成有餘暇坐  
令華屋生瀟灑鵝溪一幅萬里寬移得斷江入圖画天  
空水濶江茫茫相見女英並娥皇九嶷雲深蒼梧遠水  
姿泣露不成妝苦心抱恨何年了香骨應甘沒秋草不  
如回首謝秋風分作尹邢來漢宮

遊盱眙龜山作廻文

潮回暗浪雪山傾遠浦漁舟釣月明橋對寺門松徑小  
檻當泉眼石波清迢迢綠樹江天曉靄靄紅霞海日晴  
遙望四山雲接水碧峰千點數帆輕

宋元詩會卷三十二



欽定四庫全書

宋元詩會卷三十三

兵部主事陳焯編

陳瓘

字瑩中南劍沙縣人少嗜學不慕進取父母勉以門戶事乃一出輒中甲科掌書記湖州簽判越州州守蔡卞知其賢每事加禮而瓘已窺卞心術常欲遠之章惇入相瓘從衆道謁惇聞其名邀與細論時務瓘勸惇消朋黨持中道庶可以救弊意雖忤惇然亦驚異頗有兼收之語至都用瓘為太常博士及卞與惇合志正論遂絀哲宗每覽瓘奏章感悅約再入見執政聞而憾之出通判滄州徽宗

即位召為右正言遷左司諫極論卞惇誤國之罪  
會蔡京逐御史龔夬瓘草疏論京未及上而已罷  
監揚州料院明年還為著作郎又忤宰相曾布除  
名遠竄最後徙台州瓘嘗著尊堯錄辨正神宗時  
誣史宰相指以為罪私命凶人具獄脅瓘以死瓘  
抗辯大呼終不能害在台五年始得自便帝欲復  
用之終為執政所持轉徙江楚間  
卒年六十五紹興中賜諡忠肅

### 接花

色紅可使紫葉單可使千花小可使太子少可使繁天  
賦有定質我力能使遷自矜接花手可奪造化權衆聞  
悉驚詫遣我屢嘆吁用智固巧矣天時可易歟我欲春

採菊我欲冬賞桃汝不能栽接汝巧亦徒勞雨露草必  
生雪霜松不死不死有本性必生亦時爾汝之所變易  
是亦時所為時乎不可違何物不隨時

秀聚亭

曉色春風裏維舟一小亭看山渾不倦坐待雪峰青

崔鷗

字惠符雍丘人徙居陽翟登進士第調為鳳州司  
戶叅軍筠州推官徽宗初立以日食求言鷗上書  
數千言力白司馬光之忠直備數章惇之姦邪帝  
覽而善之以為相州教授蔡京嗾言者攻擊免官

歸屏處十年召為殿中侍御史既至而欽宗即位  
授右正言又上書極論蔡京請斬之以謝天下時  
論歸重俄得學疾加龍圖

閣學士主管嵩山崇福宮

酴醾依栢引蔓上冒其顛

春風亦已老自厭丹采媚獨留白雪花灑此千尺翠嵯  
峨珠籠冠縹緲冒佛髻幽香勿襲人恐為真色累但願  
保明姿終日奉清對要之萬物夥汙潔自有類

江月圖

冥冥一葉輕不知水與天獨於灝氣中仰見素壁圓超

然狂道士起視清夜闌自拈白玉笛吹此江月寒想當  
萬籟息逸響流空煙我從江海來形留意先還何當買  
魚蓬追此水墨仙

早春偶題

寒風浙瀝鳴枯葦小鴨睡殘猶未起更教細雨結輕寒  
坐聽蕭蕭打窗紙石盆養蒲已抽翠雕斛栽花先弄紫  
擁爐閉閣賦幽香未怕春冰生硯水

石牛莊閒居

不識春風面知從底處來紅深桃靨破綠靜水簾開物  
外心常挂人間事不諧從今江海去無復世推排

春日

落日不可盡丹林紫谷開明明遠色裏歷歷暝鴉回

題績溪雪峰樓

題詩最高處不為待人看記著今朝勝山明松雪寒

春日村居

春草門前已沒靴更無人過野人家離離細竹時聞雨

淡淡疎簾不隔花

婆娑園

晚禽噪竹百千翅殘菊橫枝三兩花  
好在山園養衰疾  
風波不到野人家

黃州道中

莫愁微雨落輕雲十里長亭未墊巾  
流水小橋山下路  
馬頭無處不逢春

倪濤

字巨濟廣德軍人卅角能屬文年十五試太學第  
一遂擢進士官著作佐郎司勳員外郎朝廷有事  
燕雲濤力言不可輕議忤王黼貶死年三  
十九明年金師圍汴始憶其言官一子

次韻毛達可給事秋懷

結茅遠人村破屋水半扉涼葉墮清響空山轉斜暉微  
官卧江漢素心久依依十年天涯秋搖落幾芳菲烏啼  
歲月去蝶夢東南飛平生丘壑志有言輒乖違不如孤  
征鴻春風自知歸

謝逸



字無逸臨川人文章學業為搢紳所推重以其所  
居溪堂稱之曰溪堂先生與弟邁俱擅詩名於江  
西在崇寧大觀間修身砥行不  
為世俗所染蓋卓然有道者

### 王立之大裘軒

小人拙生事三冬卧無帳忍寒東窗低坐待朝曦上徐  
徐晨光熙稍稍氣血暢熏然四體和恍若醉春釀此法  
祕勿傳不易車百兩君胡得此法開軒亦東向蘇公名  
大裘意豈在萬丈但觀名軒心人人如挾纊

### 閨恨

汲井澌我衣伐石固我墉塵埃不被體寂無人踪通洋  
洋西江水我車不敢渡夙駕豈不早早行畏多露行止  
既有義離合亦有時衆人豈無心不如我所之

送董元達

讀書不作儒生酸躍馬西入金城關塞垣苦寒風氣惡  
歸來面皺鬚眉斑先皇召見延和殿議論慷慨天開顏  
謗書盈篋不復辯脫身來看江南山長江滾滾蛟龍怒  
扁舟此去何當還大梁城裏定相見玉川破屋應數間

鐵柱觀

豫章城南老子宮堦前一柱立積鐵云是旌陽役萬鬼  
夜半昇來老蛟穴挿定三江不沸騰切勿搖撼坤軸裂  
蒼苔包裹鱗皴皮我欲摩娑肘屢掣旌陽挈家上天去  
只留千夫應門戶西山高處風露寒茲事恍惚從誰語  
安得猛士若朱亥袖柱橫山打狂虎

豫章別李元中宣德

舊聞諸李隱龍眠伯時已老元中少一行作吏各天涯

故人落落疎星曉  
西山影裡識君面  
碧照章江眸子瞭  
向來問道渺多岐  
只今領略歸玄妙  
老鳳垂頭禁不語  
古木查牙噪春鳥  
身在幕府心江湖  
左胥右律但坐嘯  
第愁一葉釣魚舟  
不容七尺堂堂表  
我今歸卧靈谷雲  
君應紫禁鶯花繞  
相思有夢到茅齋  
細雨青燈坐林杪

社日

雨柳重重葉風溪細細紋  
清歡惟煮茗美味只羹芹  
飲不遭田父歸無遺細君  
東臯農事動舉趾待耕耘

寄隱士

先生骨相不封侯，卜居但得林塘幽。  
家藏玉唾幾千卷，手校韋編三十秋。  
相知四海孰青眼，高卧一菴今白頭。

襄陽耆舊詢名德，祇有龐公不入州。

一作襄陽耆舊節獨苦祇有龐公難

與傳

謝過

字幼槃，操行文字與兄齊名。呂居仁評無逸詩似康樂，幼槃詩似元暉。自謂平等之論，明萬歷已酉閩人謝肇淞官京師，從內府抄得其稿，詫為奇事，皆二謝之知己也。

顏魯公祠堂

上皇御宇無長策牧羊豎子孤恩澤銀菟分印屬兒曹  
二十餘州齊陷賊常山死守平原拒公家兄弟聲名赫  
平原白首立班行忠義凜凜真嚴霜歷事四朝惟一節  
當年舌舐中丞血豈知丞相面如藍貌雖平易心巉巖  
老臣何罪死虎口到今誰為祛其銜臨風志士長悲吒  
矧瞻遺像嚴祠下未能立草迎送詞一奠椒漿淚盈把

碧筍

君不見韓潮州銀作飲醖誇工倭鑄花鏤葉太瑣碎何  
言豪士亦爾為又不見六一翁嘗吟鸚鵡紅螺詩華堂  
一醕豈不樂清歌勸酒須蛾眉吾儕山人寧有此競折  
圓荷為飲器細傾初作露珠圓滿引忽驚雲液碎鼻中  
寂寂聞妙香舌本徐徐識真味採蓮當聲花當妓豈有  
登臨百金費安得城西十頃塘水光搖蕩暑風涼時引  
碧筩如象鼻仍看翠蓋充霓裳

有懷覺範上人

道人心與貌俱古哦詩不復效等伍清疑仙掌露華墮  
新似秋空玉鈎吐要將餘事付風騷已悟玄機窺佛祖  
泐潭老子乳於菟果在叢林嘯風雨何當掃室祇樹園  
夜看金盆聽軟語我雖不是龐德公懶駕柴車入城府  
公如歸結白蓮社留我山邊一屢許

陳循中求賦高麗墨詩為作長句

老松收煙琢玄玉可試洮州鴨頭綠來從萬里古樂浪  
傳到麻源第三谷要須岱郡鹿角膠擣成方解土炭嘲



請君摩研寫新作一弄潺湲弔康樂

李成惠作二筆凡以其一見貽

琴不安絃製竒古可憐不入文房譜鼠鬚龍尾玉蟾蜍  
與汝俱成會心侶誰能好事為品題端效廣微亾輒補  
謫仙傳樣桂林家以暗投人吾竊取我書大俗如墨豬  
下慙羅趙何足數蒙公遠惠試臨池一字不成如畫虎  
欲報初無青玉案哦詩況乏驚人語淨鋪側理待君來  
慎莫躊躇畏今雨

種竹

闢地種脩竹得方緣祕經成陰向北宇倒影落中庭直  
取內含素豈惟枝鬬青龍鍾玉川子猶擬抱添丁

秋暑

秋暑不可耐秋風殊未來何時疎畫扇無處覓涼臺誰  
謂月離畢空驚山殷雷愁聞老農語南畝半黃埃

寄汪信民

泮水傳經老蓬山著史才官遊思引去祿養可歸來要

路眼誰白浮雲心自灰少年何太健君馬獨虺隤

繫纜待離日君行殊未歸寄書問毫社有夢過江西不  
見揮犀柄頻驚響馬蹄殷勤具鷄黍多謝德公妻

喜董彥遠自仙巖歸

鉢囊高掛同僧夏遠寄巖間一把茅地僻猿猴長作伴  
食貧櫻筍不充庖瘦藤任挂萬峰頂野鶴來歸千歲巢  
簡點篋中詩幾首蒼頭特遣為君抄

玉茗花

佳園昨夜變春容，清曉驚開玉一叢。  
素質定欺雲液白，淺粧羞退鶴翎紅。  
似聞金谷初無種，欲畫鵝溪恐未工。  
底事餘花避三舍，孤高元有史君風。

寄洪鴻父

兒時訪道章江上，燕雀羣中見阿鴻。  
南浦飛雲看畫棟，北窗欹枕傲清風。  
讀書長憶登山勝，作尉聊甘食齋窮。  
想見咏懷非一律，鉤章棘句定能工。

食菜

道人真是伊蒲塞頓頓園蔬入饌來紫芥寒菹叅薤韭  
黃橙苦酒伴鹽梅蒸豚不羨貯人乳飯豆亦能羹芋魁  
但恐酪奴不解事攪令枵腹轉春雷

過金山下作

揚子江中風浪生小舟如葉任欹傾槳搖但指金山寺  
霧暗初疑鐵甕城絕頂迥分雙塔秀層樓危立一僧清  
他年來訪誅茆地吾與此鄉春水盟

鳴鳩

雲陰解盡却殘暉屋上鳴鳩喚婦歸不見池塘烟雨裏  
鴛鴦相並濕紅衣

李簿家有侍兒妙麗善歌舞諸人惜其死為賦詩

余亦賦

草頭朝泣露漙漙樵歌暮歸丘隴寒當時座上客半醉  
琵琶不許近簾彈

吳彩鸞寫真

天上鳳皇難獨宿人間翡翠本雙棲丹青不與文簫共

誰遣雉東迷雀西

山間

籬落秋花未得霜  
嫣然一笑媚秋陽  
可人風味撩詩興  
不記姚家宮樣黃

徐俯

字師川洪州分寧人以父禔死國事授通直郎累  
官至司馬郎靖康中張邦昌僭位俯遂致仕因買  
婢名昌奴遇客至即呼前驅使之建炎初落職內  
侍鄭謐識俯于江西重其詩名言于高宗又用胡  
直孺汪藻薦擢右諫議大夫中書舍人紹興二年  
復賜進士出身遷翰林學士改端明殿簽書樞密

院兼參知政事時趙鼎欲以岳飛鎮荊襄俯持不  
可又劉光世乞入奏俯欲許之而鼎議大將未得  
離軍俯乃求去予祠未幾卒俯有俊才從曾幾呂  
本中遊獨以進身由中人而與趙忠簡立異識者  
病之詩六  
卷行世

白鷺洲

金陵與廬陵俱出白鷺洲相望萬里江中同二水流

雙廟

開元天寶間衮衮見諸公不聞張與許名在臺省中

唐  
庚



字子西眉州丹棱人善屬文舉進士為宗子博士  
張商英薦其才提舉京畿常平商英罷相庾亦坐  
貶安置惠州會赦復官承議郎提舉上清太  
平宮歸蜀道病卒年五十一文集二十卷

### 寄郭潛夫

我昔遊瀘江泛舟奔楚宮黔江自南來胥會涪之東黔  
江清且碧瀘江濁而紅紅碧不相入分流如卧虹羣豬  
激湍濤洶湧成戰攻須臾盡變濁混混顏色同清固不  
勝濁此理天下通君視開成間牛李爭長雄要之贊皇  
子不勝太牢公物理自古然徘徊歎無窮

張曲江鐵像詩

像在韶州韶人相傳  
明皇悔時所鑄云

開元太平久錯處非一拍就令乏賢人何至相仙客直  
道既凋喪曲江遂疎斥沒黯困後薪賈生罷前席金鑑  
東高閣鐵胎空數尺妙處難形容英表良髣髴摩訶許  
國安尚想立朝色同時反棄置異代長歎息

雙榕

水東雙榕間有叟時出遊清風衣屨古白雪鬚髯虬吟  
哦明月夕簸弄寒江秋驚傳里中兒不泊岸下舟君看

鬼趣中有此風味不安知非黃石但恨無留侯此生鉏  
犁手誤入簪紳流無功折毫髮負罪平山丘政爾求澡  
濯聞之歎綢繆摳衣倘可親跪履安敢羞得聞半偈語  
一解終身憂性不喜伐國兵書非所求

蜜果

臣聞失旦雞已曉猶強鳴書生坐口窮抵死輸血誠嶺  
南貢蜜果海道趨彤庭黃蜂樂受職紫鳳助揚舲忠勤  
雖云至思慮良未精由來瘴癘鄉不識霜雪情土風不

待講氣象昏如醒杭稻杭稻熟水泉水泉腥而况野果  
實豈足奉聖明未論體性殊已覺面目生食之倘有補  
勞者甘如飴政恐無裨益所出非和平上林寧少此下  
箸安可輕軒轅嘗百草上古雜神靈武王嗜鮑魚幾諫  
仗老成蒟蒻復何有葵藿甘自傾

瘧疾示友人

體中初微溫來勢如湯鑊忽然毛髮起冷撼如振鐸良  
久交戰罷項背如釋縛尚覺頭涔涔眉額如鏡鑿空日

一寒暑有準如契約伏枕兩晦朔惝然如空索平生十  
圍腰病起如饑鶴衰髮本無幾脫去如秋籜到今僅能  
步出沒如尺蠖舊聞五嶺法有此萬戶瘡而我自僑寓  
了不蒙濶略况子又持養何至亦例著此身自空虛客  
疾安所託請作如是觀無病亦無藥

喜雨呈趙世澤

去年雨多憂水潦今年雨少憂枯槁都緣縣政失中和  
水旱年年勤父老前時雲起雨欲落夜半風來還一掃

明朝引首望雲漢屋上晨暎仍杲杲賦輸百萬未破白  
簿脚何緣得勾倒上書自劾欲歸去老婦挽衣傍奪橐  
技窮往訴北山神是夕沛然償所禱稻畦穠稔勢已活  
竹裏蕭疎聲更好故應神意閔孤拙苟免歲終書下考  
便安杵臼伺秋成雲子滿田行可擣

劍州道中見桃李盛開而梅花猶有存者

桃花能紅李能白春深何處無顏色不應尚有數枝梅  
可是東君苦留客向來開處當嚴冬桃李未交遊中

即今已是丈人行肯與年少爭春風

內前行

內前車馬撥不開文德殿下宣麻回紫薇侍郎拜右相

中使押赴文昌臺旄頭昨夜光照牖是夕收芒如禿帚

明日化為甘雨來官家喚作調元手

右相視事明日始得雨喜甚書商霖

二大字賜之

周公禮樂未要作致身姚宋也不惡向來兩翁

當國年民間斗米纔四錢

鳴鵲行

簷前羣鵲鳴相呼法當有客或遠書吾今何處得書尺  
而況賓客乘軒車平生眼中抹泥塗泛愛了不分賢愚  
卒為所賣罪滿軀放逐南越烹蟾蜍百口寄食西南隅  
三年莫知安穩無家書已自不可必更望故人雙鯉魚  
故人頃來絕能疎况復萬嶺千江湖雞肋曾是安拳餘  
至今畏客如於菟豈惟避謗謝還往此日誰肯窺吾廬  
杜門却掃也不惡何但忘客兼忘吾喧喧鳴鵲汝過矣  
曷不往噪權門朱



冬雷行

百蟲蟄處安如家阿香夜起推雷車一時技癢不忍爬  
撼動尺蠖掀龍蛇龍蛇尺蠖踞已久亦欲奮迅舒頑麻  
夢中一震忽驚躍發破堦戶排泥沙泥沙已出雷遽止  
錯愕欲去難藏遮蟲蛇狼狽莫知數間有伏龍吁可嗟

蜚兒歌

瀘南二子天一邊思之不見今三年阮咸已老得遙集  
白髮自愧還欣然未看顱骨并頰顱啼中已有過秦篇

諸田何得賤庶孽會斬壯賈摧強燕

夜坐感懷

聲斷鍾樓月文書對坐時破窗燈焰走凍研筆鋒遲名利髮將鶴風霜手欲龜何當一衰雨披曉剪尊絲

武陵道中

朝持漢使節暮作楚囚奔路入離騷國江通款乃村垣墻知地濕草木驗冬溫寂寞桃源路行人祇斷魂

收景初書并示藥物

乾坤心腹友江海鬢毛斑  
藥補他鄉闕書開故國顏  
何時乘下澤此日仰高山  
曾是歸耕耦由來有賜環

九日懷舍弟

重陽陶令節單闕賈生年  
秋色蒼梧外衰顏紫菊前  
登高知地盡引滿覺天旋  
去歲京城雨茱萸對惠連

夜坐懷舍弟

無雲仍露坐有月更江皋  
沈陸傷吾道浮生憶爾曹  
扁舟應夏口此日數秋毫  
不見今三載當時已二毛

雜詩

惠州作八首

屏跡舍人巷灌園居士橋  
花開不旋踵草薶復齊腰  
蛤吠明朝雨雞鳴闇夜潮  
未能全獨樂鄰里去還邀

已絕經年筆仍開盡日門  
身謀嗟翠羽人事嘆榕根  
蔬食風掀市樓居水破村  
嶺南霜自薄何得鬢邊繁

便歸良不惡未去且隨緣  
戶口知無瘴謳歌覺有年  
滕賤得句後桂酒抱愁邊  
經術吾衰矣猶堪舉力田

不死良難學全生或可幾  
茶隨東客到藥附廣船歸  
碁

倦收成敗書慵卷是非關心無雜慮魂夢入精微  
為農沙子步附保水西鄉隱几江天遠開門佛土香時  
情荒徑草野色淡漁梁欲縱高秋目東偏短作牆

已分詩驅使寧辭酒過差南烹人釣蛤北信客占鴉年  
事侵膚理憂端宿肺家向來功業興到晚詠餘霞

海氣東南上野煙申酉間草平連別洞雨轉入他山道  
路魚鹽去樵蘇竹木還西江并北客相對各蒼顏

水過魚村濕沙寬牧地平片雲明外暗斜日雨邊晴山

轉秋光曲川長暝色橫瘴鄉人自樂耕釣各浮生

江漲

秋來雨似澆雨罷水如潮市改依高岸津喧救斷橋雲  
陰哭鳩婦池溢走魚苗天意良難測前時旱欲焦

謾成

雲暗便窗破山寒賴屋低往還天外少早晏雨中迷書  
冊開仍闔履聲東復西何嘗有所賦得句旋安題

野望

賴有澄江在專供倚杖清水裁偏岸直雲截亂山平  
擊鼓知農隙雞豚覺歲成却緣搖落後木杪得孤城

醉眠

山靜似太古日長如小年餘花猶可醉好鳥不妨眠  
世味門常掩時光簾已便夢中頻得句拈筆又忘筌

送客之五羊

不到番禺久繁雄良自如江山禹貢外城郭漢兵餘  
圓折明珠浦旁行異域書五羊雖足樂雙鯉未宜疎

晚春寄友人

眼底春愁惱殺儂揚州往事旋成空風流只合稱狂客  
衰颰何堪作病翁水國春深梅子雨江天日暮鯉魚風  
何時執手同尊酒收拾清歡笑語中

春日郊外

城中未省有春光城外榆槐已半黃山好更宜餘積雪  
水生看欲倒垂楊鶯邊日暖如人語草際風來作藥香  
疑此江頭有佳句為君尋取却茫茫



南遷

去去寬鄉託此蹤  
閭中無地頓衰翁  
未誅綺語猶輕典  
更賜羅浮有底功  
蝦菜賤時皆丙穴  
茅柴美處即郛筒  
着鞭要及春前到  
趁賦梅花庾嶺東

初到惠州

盧橘楊梅乃爾甜  
肯容遷謫到蒼尖  
因行採藥非無得  
取足看山未害廉  
辯謗若為家一喙  
著書不直字三緘  
老師補處吾何敢  
政為宗風不敢謙

次勾景山見寄韻

此生正坐不知天豈有薤苓解引年但覺轉喉都是諱  
就令搖尾有誰憐腰金已付兒曹佩心印還當我輩傳  
他日乘車來問道韋間相顧共延緣

收家書

西川消息到南州骨肉無他歲有秋驥子解吟青玉案  
木蘭堪戰黑山頭即時旅思春水折昨夜燈花黍穗抽  
從此歸田應坐享故山已為理菟裘

北風累日不止寒甚寄鄭潮陽

山前臘雪想紛紛  
風到南訛盡處村  
瓮面不容存酒子  
牀頭幾欲爨桐孫  
園林呼舞知衰怯  
窗戶奔馳覺眩昏  
咫尺潮陽五袴國  
可能分我一襦溫

閒居

未許幽人曉夢長  
朝朝親炷佛前香  
有詩為愛袁家酒  
無病緣抄陸氏方  
身雜蜚中誰是我  
食除蛇外總隨鄉  
白沙翠竹門前路  
疑出西郊向草堂

聞勾景山補盤屋丞仍聞學道有得以詩調之發  
萬里一笑

人言盤屋似江湖莫對丞哉歎負余別後耳根無正始  
向來紙尾得黃初可憐鬼谷縱橫口全讀神溪縹緲書  
臣朔許長錢許少何當天子念公車

遣興

八千岐路愁何補四十光陰老亦宜此去只堪犀首飲  
向來都是虎頭痴逢時有道其如命得意無言所恨遲

詩債即今渾倚閣新篇惟有莫相疑

聞鄭二對吏五羊

舊友年來略散亡  
新收鄭子亦皇皇  
歲云暮矣無雙雁  
我所思兮在五羊  
獄吏事權先自貴  
書生蹤跡況能狂  
風流人物今餘幾  
何忍羣兒復謗傷

重陽後二日從無盡泛舟遊處士臺故詩人秦龜  
從所居

旱河經雨水微沙  
船貼臺根日未斜  
三徑就荒悲白土

一樽相屬對黃花已將遠眺收平楚更遣清言到永嘉  
要見仙翁頭似漆請看醉後落烏紗

瀘人何邦直者為安溪把截將有功不賞反得罪  
來惠州貧甚吾呼與飲為作此詩

楚人季布以勇顯魯國朱家用俠聞馳馬彎弓臣好武  
吹毛洗垢吏深文王孫此日誰漂母卿子前時號冠軍  
滿引一杯齊物論白衣蒼狗聽浮雲

寓精道齋感懷家山作

論兵作賦兩怱怱人事光陰轉首空  
五夜夢飛山色裏  
一年秋在雨聲中揚州騎鶴非無意  
上蔡牽黃信此窮  
幸有林泉未歸去欲將清興問征鴻

遊仙雲宮

出郭三竿日橫江一葦航  
雀飛田有麥蠶罷野無桑  
下馬危梯滑開門古殿香  
雨餘丹井溢苔入醮壇荒  
畫老星辰動碑殘歲月亡  
鐘聲落城市符祝走村鄉  
野鳥啼巴蜀山崖刻漢唐  
臨歸更回首惜此一襟涼

春日雜興 三首

愛梅長恐着花遲  
日禱東風莫後期  
及得見梅還冷淡  
東風全在小桃枝

茸茸小雨弄春晴  
已有狂花未見鶯  
便使一年惆悵在  
曉窗寒夢別輕盈

月團新碾破春醪  
賴有歸鴻寄好音  
人在天涯莫回首  
恐偷華髮上瑤簪

渡汚



鶴歸遼海悲人世  
獨入巴山叫月明  
惟有沙蟲今好在  
往來休並水邊行

白鷺

說與門前白鷺羣  
也應從此斷知聞  
諸君有意除鉤黨  
甲乙推求恐到君

蔡京

興化仙遊人字元長  
登熙寧三年進士  
拜中書舍人  
改知開封府  
當司馬光秉政  
復差役法  
京首如約  
光甚喜已而臺諫言  
京挾邪壞法  
出知成德軍  
紹聖初入權戶部  
尚書章惇復變法  
議久不決京

謂惇曰取熙寧成法施行之爾何以講為惇然之  
自爾兩人相倚以濟及徽宗立京用提舉洞霄宮  
深結中使童貫于杭因而得柄大政為所欲為害  
政黨邪卒致宗社之禍其得以耄年死道路者倖  
也

寄兒攸遠征

老嬾身心不自由封書寄與淚橫流百年信誓當深念  
三伏征塗合少休目送旌旗如昨夢心存關塞起新愁  
緇衣堂下清風滿早早歸來醉一甌

題殿壁

瓊瑤錯落密成林，檜竹交加午有陰。  
恩許塵凡時縱步，不知身在五雲深。

### 孫覲

字仲益，常州人。政和間進士，相傳蘇子瞻南遷時，一妾有娠，不得偕往，遂嫁常州孫氏。及子瞻北歸，則仲益生六七齡矣。命名曰覲，謂賣見也。覲詩不媿作者，惟誌万俟卨之墓，獲罪名，教其為東坡遺胤，未知是否。聊因野史所載而存之。

### 富陽道中 二首

渺渺行雲幔，溶溶曳水衣。  
雷翻巢墮乳，風落網粘飛。  
獨

拄青藜杖來推白板扉平生丘壑趣漂泊寸心違

白帽炎州客青裙酒姥家微風搖扇浪細雨落簷花客  
舍休占鵬蠻村欲饌蛇會令醒復醉高枕送生涯

化度寺

失路迷千嶂投林借一枝扣門竹西寺立馬日斜時  
雙鑠僧窺戶睂眄犬透籬定知嫌不速明日與君辭

題硤江蕭氏菴

二首

雪屋清如洗雲崖翠作堆破扉風自掩敗壁雨先頽野

色初還柳林香尚有梅滄江千萬頃一鳥鏡中回  
雲遂歸心亂山隨望眼賒疎林散晚照淺溜咽春沙客  
路三年過僧窗一笑譁此生安稅駕有地即為家

讀類說二首

亡是談烏有彭郎得小姑誰言鳩作婦謾道雁為奴  
絡緯那能織提壺豈解酤龜茲堪一笑非馬亦非驢

額癢會出耳足閒仍有釐石頑飛作燕楮老孕生雞  
楓癭那因怒松肪豈是肥君看轉凡手亦復化神奇

龜潭

擺落攀緣斷驅除磊塊平庭松敵老健潭水伴孤清待  
月出時看尋雲起處行相隨木上坐徙倚到參橫

到象州寓行衙太守陳容德攜酒見過

飮坐黃柑喫手香堆盤丹荔照人光莫辭蠶酒一尊赤  
會壓瘴茅千里黃未省讒言遭薏苡直將空腹傲檳榔  
酒醒夢覺知何處樹影叅差月滿廊

雉山寺青蘿閣

蠻村避謗三年過野寺尋僧半日閒  
小檻吹香花漠漠斷崖漱碧水潺潺  
枕椰葉底秋聲滿栢子煙中夢還  
便擬買舟隨釣叟一蓑煙雨繫滄灣

熊夫人遣介欲壻澤民小詩戲之

牆頭鄰女三年望戶外文君一笑窺  
欲得賢夫嫁張耳此真佳壻是義之  
定知不折飛梭齒似說先齊舉案眉  
豈有侯門深似海水流紅葉謾題詩

宋元詩會卷三十三